

# ՀԱՅՈՒԹՅԱՆ ԿԱԶՄԱԿԵՐՊՄԱՆ ԵՎ ՏԵՂԵԿԱՏՎԱԿԱՆ ԱՆՎՏԱՆԳՈՒԹՅԱՆ ՀԻՄՆԱԽՆԴԻՐՆԵՐԸ

## *Գագիկ Հարությունյան*

Հողվածում ներկայացված են Հայության որոշ հիմնախնդիրները և հնարավորությունները կազմակերպչական և տեղեկատվական անվտանգության ոլորտներում: Դասակարգվել և փորձագիտական գնահատականներ են տրվել Հայությանն ուղղված մարտահրավերներին, ինչպես նաև վերհանվել են այն հնարավորությունները, որոնք բխում են այդ նույն մարտահրավերներից: Անդրադարձ է կատարվել Հայության խնդիրներին արդի տեղեկատվական պատերազմների համատեքստում, դասակարգվել և քննարկվել են այն ռեսուրսները, որոնք անհրաժեշտ են Հայության դեմ ուղղված տեղեկատվական գործողություններին լիարժեք դիմակայելու համար: Համակարգվել են Հայության տեղեկատվական ոլորտի կազմակերպման ռազմավարական խնդիրները, հիմնավորվել է միասնական Համահայկական տեղեկատվական դաշտ ձևավորելու հրատապությունը: Առանձնահատուկ քննարկվել է կազմակերպչական ցանցակենտրոն տեխնոլոգիան՝ որպես Հայության կազմակերպման ամենաարդյունավետ ձևաչափ, և այդ համատեքստում դիտարկվել են Հայաստանի ու Հայության ապագային վերաբերող սցենարային որոշ հնարավոր զարգացումներ: Համառոտակի շարադրվել են արդի տեղեկատվական քաղաքականության տարրերը, այդ առիթով ուշադրություն է դարձվել քաղաքական նոր տեխնոլոգիայի՝ մոբայլ քաղաքականության ի հայտ գալուն: Կատարված եզրահանգումներում ներկայացվում են, մասնավորապես, Հայության տեղեկատվական ոլորտի մարտավարական բնույթի հրատապ խնդիրները:

Տեղեկատվական գործունն արդի ժամանակաշրջանում որոշիչ դերակատարում է ձեռք բերել անհատի, հանրության, պետության ու ազգի գործունեության գրեթե բոլոր ոլորտներում: Տեղեկատվության տիրապետումն է, որ հնարավոր է դարձնում հետևել և համարժեք արձագանքել արագ փոփոխվող աշխարհի իրողություններին: Տարաբնույթ տեղեկատվական գործողությունները, պատերազմներն այսօր փոխադրվել են քաղաքական հարթություն և հանդիսանում են աշխարհաքաղաքականության, աշխարհատնտեսության և աշխարհագաղափարախոսության կարևորագույն գործիքներից մեկը: Հայության կազմակերպման և անվտանգության տեսանկյունից քաղաքական-տեղեկատվական այս նոր իրավիճակը պարունակում է և՛ վտանգավոր մարտահրավեր-

ներ, և՛ նոր հնարավորություններ: Մակայն Հայության տեղեկատվական ոլորտի այդ հրատապ հարցերին գիտական-վերլուծաբանական հանրության կողմից անհրաժեշտ ուշադրություն չի հատկացվում: Առայսօր կարելի է փաստել, որ խնդրի վերաբերյալ հայեցակարգային մոտեցումների խիստ պակաս է զգացվում, իսկ գործնական հարթությունում մենք երբեմն զիջում ենք մեր մրցակիցներին:

**Հայության տեղեկատվական անվտանգությունը.** Դժվար է վիճարկել այն փաստը, որ ազգերի, պետությունների և քաղաքակրթությունների զարգացումը և մրցունակությունը միանշանակորեն պայմանավորված են ազգային անվտանգություն (*ԱԱ*) վերաբերյալ նրանց ունեցած պատկերացումների հայեցակարգային մակարդակով: Համաձայն փորձագիտական մոտեցումների, ազգային անվտանգություն հասկացությունը ներկայացնում է երեք բաղադրամասերի՝ ռազմաքաղաքական անվտանգության, սոցիալ-տնտեսական անվտանգության և տեղեկատվական անվտանգության (*ՏԱ*) ամբողջությունը: Այդ ոլորտները փոխկապված են, և դրանցից յուրաքանչյուրն իր հերթին որոշակի, նույնպես կապակցված բաղադրամասերի միասնություն է: Մասնավորապես՝ *ՏԱ* հասկացությունը ներառում է ոչ միայն տեխնիկական տեղեկատվական համակարգերի ապահովության խնդիրները, այլև այն ամենը, ինչ վերաբերում է քաղաքակրթական-մշակութային, հոգևոր-հոգեբանական, մտավոր-գիտելիքային և կազմակերպչական ոլորտներին: Կարելի է պնդել, որ *ՏԱ* հասկացությունը մի փոքր ավելի անմիջականորեն, քան *ԱԱ* մնացյալ բաղադրամասերը, կապված է մարդկային, հանրային և ազգային գործոնների հետ:

Ակնհայտ է, որ հայկական *ՏԱ* համակարգը պետք է ներառի ոչ միայն Հայաստանի (այս հասկացությունը *տեղեկատվական տեսանկյունից* ենթադրում է ՀՀ-ն, ԼՂՀ-ն և Ջավախքը), այլև Համաշխարհային Հայության տեղեկատվական խնդիրների ողջ համախումբը: Նշենք նաև, որ ՀՀ-ում ընդունված «Ազգային անվտանգության ռազմավարություն» փաստաթղթում փաստորեն ամրագրված են մեր ազգային անվտանգության երկու սուբյեկտները՝ Հայաստանը և Հայությունը [1]: Այսպիսով, Հայաստանի և Հայության *ՏԱ* ապահովման գործառնությունները, բնականաբար, շաղկապված են և հենված պետք է լինեն նվազագույնը փոխընդհանուր, իսկ առավել ցանկալի է՝ սիներգետիկ (փոխուժեղացնող) սկզբունքի վրա:

Նկատենք նաև, որ Հայաստանի տեղեկատվական ոլորտի խնդիրներն այս կամ այն չափով հստակեցված են: Այսինքն՝ կարելի է ենթադրել, որ եթե ընդունվեն փորձագիտորեն հիմնավորված գործադիր ու օրենսդրական որոշումներ, ապա հնարավոր կլինի ձևավորել Հայաստանի *ՏԱ* արդյունավետ համակարգ և բարելավել տեղեկատվական առումով ոչ այնքան բարվոր

իրավիճակը [2-4]: Համահայկական *SU* համակարգ ձևավորելը, անշուշտ, ավելի բարդ, սակայն, ըստ մեզ, նույնպես միանգամայն իրատեսական խնդիր է: Սակայն Հայության տեղեկատվական ոլորտում եղած հնարավորությունները և հիմնախնդիրները փորձագիտական տեսանկյունից անգամ խմբավորված չեն:

***Հայության հնարավորությունները և հիմնախնդիրները SU համատեքստում.*** Հայության տեղեկատվական կազմակերպման տեսանկյունից առկա են հետևյալ հիմնարար նշանակություն ունեցող *բարենպաստ գործոնները.*

1. Հայրենիքի գաղափարը և երկու հայկական պետությունների՝ ՀՀ ու ԼՂՀ գոյությունը:
2. Հայկական ուրույն քաղաքակրթության առկայությունը և դրա վերաբերյալ եղած ընդհանրական պատկերացումները:
3. Ցեղասպանության իրողությունը, հիշողությունը և *Հայ դատի* խնդիրը:
4. ՀՀ և ԼՂՀ ռազմաքաղաքական հարաբերությունների համախումբը Ադրբեջանի և Թուրքիայի հետ:

Վերջին երկու գործոններն այսօր վերածվել են գլոբալ քաղաքականության բաղադրիչի, ինչը Հայության տեղեկատվական ինտեգրման տեսանկյունից նպաստավոր հանգամանք է: Հատկանշական է, որ վերջին կետը, ըստ էության, *Հայ դատի* մի մասի արդիական արտացոլումն է: Սակայն այսօր փորձագիտական հանրությունում շատերը գտնում են, որ վերոնշյալ ռազմավարական բնույթի գործոնները Հայության կազմակերպման տեսանկյունից դեռևս բավարար չեն, և անհրաժեշտ են նոր, արդի աշխարհի տրամաբանությունը համահունչ գաղափարներ ու նախագծեր, որոնք կնպաստեն Հայության կազմակերպման գործընթացին:

Հայության *SU* համակարգի ձևավորման համար որպես կարևորագույն դրական գործոն պետք է համարել տեղեկատվական-հաղորդակցային ժամանակակից տեխնոլոգիաների զարգացումը. այս ոլորտի հնարավորություններին մենք դեռ կանդրադառնանք: Որպես նպաստավոր միտում պետք է ընդունել նաև ազգային փոքրամասնությունների վերաբերյալ միջազգային և հատկապես եվրոպական կոնվենցիաների ընդունումը. դրանք կարող են նպաստել հայկական համայնքներին՝ տվյալ երկրի օրենսդրության շրջանակներում բարելավելով ազգային տեղեկատվական ոլորտը:

Մինևույն ժամանակ, Հայության *SU* համակարգի ստեղծման գործում առկա են լուրջ հիմնախնդիրներ: Փորձենք դասակարգել այդ *անբարենպաստ գործոնները.*

1. Արտերկրի Հայության թիվը նվազագույնը 2 անգամ մեծ է, քան Հայաստանում բնակվողներինը, այսինքն՝ Հայության տեղեկատվական ապահովությունը, անգամ գուտ քանակական տեսանկյունից, ավելի մեծածավալ խնդիր է, քան Հայաստանինը:
2. Հայությունը բաժանված է տարբեր հատվածների ըստ լեզվակրոնական հատկանիշների. հիմնախնդիրը վերաբերում է ոչ միայն Թուրքիայի իսլամացված հայերին, այլև տարբեր երկրներում բնակվող մեր բազմաթիվ այլալեզու և այլադավան հայրենակիցներին. այս հանգամանքը տեղեկատվական ինտեգրման տեսանկյունից լուրջ հաղորդակցային և հոգեբանական խոչընդոտ է հանդիսանում:
3. Աշխարհագրորեն Հայությունը սփռված է մոտ 100 երկրներում, որոնք պայմանականորեն կարելի է դասակարգել ըստ հետևյալ քաղաքակրթական գոտիների [5, 6].
  - Հայաստան (Հայկական ուրույն քաղաքակրթության տարածաշրջան):
  - Ուղղափառ-սլավոնական քաղաքակրթական գոտի. այստեղ պետք է հատկապես կարևորել հետխորհրդային տարածքը և չանտեսել այսպես կոչված *բյուզանդական ժառանգությանը հավականոդ* երկրները (օրինակ՝ Հունաստանը):
  - Անգլո-ամերիկյան քաղաքակրթական դաշտ (այստեղ ընդգրկված են այսպես կոչված անգլիախոս երկրները՝ ԱՄՆ, Կանադա, Մեծ Բրիտանիա, Ավստրալիա, Նոր Զելանդիա):
  - Եվրոպական քաղաքակրթական գոտի:
  - Իսլամական (ասիական) քաղաքակրթական տարածք (այստեղ պետք է կարևորել առաջին հերթին Մերձավոր և Միջին Արևելքի երկրները):
  - Լատինական (կաթոլիկ) քաղաքակրթական դաշտ, Հարավային Ամերիկայի երկրներ, Իսպանիա և այլն:

Վերոնշյալ քաղաքակրթությունները որոշակի ազդեցություն են գործել և գործում Հայության տարբեր հատվածների աշխարհընկալման, հոգեկերտվածքի, մշակութային, քաղաքական և սոցիալ-տնտեսական կողմնորոշումների վրա, ինչը հաղորդակցական բնույթի լուրջ հիմնախնդիրներ է առաջացնում: Ակնհայտ է նաև, որ խոշոր քաղաքակրթական գոտիների ներսում Հայությունը նույնպես միատարր չէ. փորձենք համեմատել, օրինակ, հետխորհրդային տարածքից՝ Սիբիրում և Մոլդովայում բնակվող հայերի աշխարհընկալումը:

Ներկայացված անբարենպաստ գործոնները, անշուշտ, լուրջ մարտահրավերներ են Հայության համար: Միննույն ժամանակ, ստեղծված իրադրությունը նաև հնարավորություններ է պարունակում. տարբեր քաղաքակրթությունների ներկայացուցիչների հետ Հայության հատվածների շփվելու ունա-

կությունը պետք է ընդունել նաև որպես լրացուցիչ ռեսուրս գլոբալացվող աշխարհում<sup>1</sup> ազգային կենսագործունեությունը և մրցունակությունն ապահովելու համար (ի դեպ, նման հնարավորությունների են տիրապետում խիստ սահմանափակ թվով ազգեր): Այսպիսով, Հայության տարբեր հատվածները որոշակի ֆունկցիոնալ ծանրաբեռնվածություն են կրում և, կիրառելով ժամանակակից եզրաբանությունը, յուրովի «գլոբալ աշխարհի դարպասներ» են ներկայացնում [7]: Անշուշտ, այդ հասկացությունը ենթադրում է ոչ միայն Հայաստանի պարագան, որի համար Մփյուռքը «ասիմետրիկ ռեսուրս»<sup>2</sup> է և գլոբալ մակարդակով գործելու հնարավորություններ է ընձեռում. Հայության տարբեր հատվածները միմյանց համար նույնպես «ասիմետրիկ» հնարավորություններ են տրամադրում՝ «գլոբալ աշխարհի դարպասներ» հանդիսանալով:

Սակայն, բացի վերոնշյալ, մասամբ՝ ազգային, յուրահատկություններից բխող խնդիրներից, Հայության տեղեկատվական կազմակերպման գործում առկա են նաև այլ բնույթի մարտահրավերներ:

**Գլոբալ զարգացումները, տեղեկատվական պատերազմները և Հայությունը.** Ինչպես հայտնի է, անկախ պետությունների թիվը վերջին ժամանակաշրջանում աճում է, և այդ գործընթացը դեռևս շարունակվելու է: Սակայն, համաձայն փորձագիտական կանխատեսումների, գոյություն ունեցող ազգերի և պետությունների մի մասը ռազմավարական հեռանկարում հնարավոր է, որ կորցնի իր էթնիկ-քաղաքակրթական ինքնությունն ու վերածվի համաշխարհային քաղաքականության կրավորական սուբյեկտների. նման միտումներ ուրվագծվում են, օրինակ, Եվրոպայում: Այս խնդիրը հրատապ է հատկապես ոչ մեծ ազգերի և պետությունների համար, որոնք չեն տիրապետում ինքնության պահպանման համար անհրաժեշտ, մասնավորապես՝ տեղեկատվական ոլորտի ռեսուրսների: Այդ համատեքստում նկատենք, որ այսօր ինքնության համար, ի թիվս այլ հանգամանքների, սպառնալիք են հանդիսանում տվյալ հանրության-ազգի-պետության կողմից չվերահսկվող գլոբալ քառսային տեղեկատվական հոսքերը: Դրան զուգահեռ, ինքնության կորուստը կամ վերափոխումը/վերասերումը կարող են հետևանք լինել այսպես կոչված *Nation Building* (ազգակառույց) տեխնոլոգիաների տարբեր պարունակող նպատակաուղղված քարոզչական-մանիպուլյատիվ տեղեկատվական հարձակումների: Նման ուղղորդված, նպատակային-թիրախային տեղեկատվական գործողությունների համախումբը ստացել է տեղեկատվական պատերազմ անվանումը, որի հայեցակարգային եզրաբանությունը մշակվել է ամերիկյան ՌԵՆԴ

<sup>1</sup>Նկատենք, որ ներկայիս արդեն բազմաբևեռ աշխարհակարգի համար որպես զարգացման հնարավոր սցենար կարելի է դիտարկել *բազմաքաղաքակրթական* համակարգը, որում պետությունները համախմբված են համաձայն իրենց քաղաքակրթական հատկանիշների:

<sup>2</sup> *Михаил Агаджанян*, Диаспоральный ресурс Армении как «асимметричный» ответ на ее изоляцию, <http://www.noravank.am/?l=2&d=19>

«ուղեղային կենտրոնի» կողմից: Տեղեկատվական պատերազմների նպատակն է, մասնավորապես, «համալիր ձևով ներգործել հակառակորդի ազգային համակարգի և նրա ղեկավարության վրա, ինչը կարող է հանգեցնել տեղեկատվական պատերազմ իրագործողի համար հակառակորդի կողմից նպաստավոր որոշումներ ընդունելուն»:

Կարելի է բազմաթիվ օրինակներ բերել, որոնք հաստատում են, որ Հայաստանը և Հայությունը տեղեկատվական պատերազմի սուբյեկտ են<sup>1</sup>: Նշենք նաև, որ այսօր Հայության համար առավել մեծ վտանգներ են պարունակում *երկրորդ սերնդի* տեղեկատվական պատերազմները, որոնց միջոցով, մասնավորապես, ենթադրվում է հակառակորդի հանրությունում կամ պետությունում հասնել հետևյալ նպատակներին [8].

- Բարոյագուրկ, ոչ հոգևոր մթնոլորտի և սեփական մշակութային ժառանգության նկատմամբ բացասական վերաբերմունքի ստեղծում:
- Անվստահության և կասկածամտության սերմանում, կուսակցությունների միջև քաղաքական հարաբերությունների սրում ու փոխոչնչացման դրդում:
- Պետության և ազգի միջազգային հեղինակազրկում, այլոց հետ նրանց համագործակցության վնասում:
- Քաղաքական, տնտեսական, պաշտպանական և այլ ոլորտներում պետության և ազգի կենսականորեն կարևոր շահերի վնասում:

Ինչպես տեսնում ենք, երկրորդ սերնդի տեղեկատվական պատերազմներում առավել կարևորվում են հոգևոր-գաղափարական բնույթի գործոնները: Այս առումով տեղին է նշել, որ վերոհիշյալ դրույթներն արտացոլում են գտել ներկայիս այսպես կոչված «գունավոր» հեղափոխություններում, ինչին, մասնավորապես, Հայությունը ակնհաս էղավ 2008թ. ՀՀ նախագահական ընտրությունների հետ կապված զարգացումներում: Կարելի է պնդել, որ տեղի ունեցածը նոր սերնդի տեղեկատվական պատերազմների դասական նմուշ է, երբ ներազդող կողմը լուծում է իր առջև դրված խնդիրները, մասնավորապես՝ անվստահություն և անհանդուրժողականություն սերմանելով Հայության տարբեր հատվածների միջև<sup>2</sup>:

Ակնհայտ է, որ տեղեկատվական պատերազմներին դիմակայելու, իսկ

<sup>1</sup> Տե՛ս, օրինակ, *Самвел Мартиросян*, Некоторые вопросы информационной безопасности Армении и Армянства, <http://www.noravank.am/ru/?page=analitics&nid=679>; *Самвел Мартиросян*, Азербайджан наращивает информвойну, <http://www.noravank.am/ru/?page=theme&thid=3&nid=986>; *Айкарам Наапетян*, К вопросу об увеличении количества азербайджанских сайтов в интернете, <http://www.noravank.am/ru/?page=theme&thid=3&nid=985>

<sup>2</sup> Տեղեկատվական համատեքստում ուշագրավ են, մասնավորապես, ընտրական գործընթացում «ղարաբաղցի-հայաստանցի» տարբերակման սերմանումը և դրան բացասական-քաղաքական երանգ հաղորդելը, որոշ հայ համայնքների կողմից ընտրական իրողություններին ոչ համարժեք արձագանքումը և արտերկրում ՀՀ (հետևաբար՝ նաև Հայության) բացասական իմիջի ձևավորումը:

անհրաժեշտության դեպքում՝ նաև նախահարձակ լինելու համար անհրաժեշտ են որոշակի տեղեկատվական ռեսուրսներ: Փորձենք գնահատել այդ ռեսուրսները Հայության *SU* համակարգի ձևավորման տեսանկյունից:

**Հայության ռեսուրսները.** Ազգային ռեսուրսների համակարգումը և դրանց գնահատումն ազգային ու մասնավորապես՝ տեղեկատվական անվտանգության համակարգի կարևորագույն գործառնություններից են: Այդ իսկ պատճառով, առանց խնդիրը համապարփակ դիտարկելու հավակնությունների, համառոտակի և սխեմատիկորեն ներկայացնենք Հայության անվտանգությանն անհրաժեշտ ռազմավարական ռեսուրսները և փորձենք դրանք գնահատել *SU* տեսանկյունից.

1. *Քաղաքակրթական* կամ այլ խոսքերով՝ ազգային, հոգևոր և մշակութային ոլորտին պատկանող ռեսուրսներ:
2. *Տեխնոլոգիական.* այս եզրի տակ ենթադրում ենք մարդկային, մտավոր-ստեղծագործական, գիտատեխնիկական և զուտ տեղեկատվական-լրատվական ռեսուրսները:
3. *Նյութական* կամ արտադրական, առևտրային-ֆինանսական և այլ ձեռներեցային բնույթի կարողություններ:
4. *Կազմակերպչական,* այսինքն՝ ինքնակազմակերպվելու, կենսագործունեության համար անհրաժեշտ կառույցների (որոնց թվում՝ պետություն և համայնք, քաղաքական, հասարակական, տնտեսական, ազգային-ինստիտուցիոնալ կազմակերպություններ ու այլ ձևաչափեր) ձևավորումը, այդ կառույցների միջև փոխհամագործակցության ապահովումը և դրանց միջոցով ազգային շահերի պաշտպանությանն ուղղված գործառնություններ և ծրագրեր իրագործելու կարողությունը:

Համառոտակի գնահատենք վերոնշյալ ռեսուրսները.

- Հայությունը, միանշանակորեն, ուրույն, հայկական *քաղաքակրթական արժեքների կրող է և այդպիսով լիարժեքորեն տիրապետում է քաղաքակրթական բնույթի ռեսուրսների* (տե՛ս, մասնավորապես, [6, 9]):
- Բավարարին գրեթե մոտ են *տեխնոլոգիական ռեսուրսները*, սակայն պետք է հաշվի առնել, որ.
  - \* համեմատաբար սակավ են և հաշվառված չեն<sup>1</sup> (ինչը նույնպես հրատապ կազմակերպչական խնդիր է) Հայության մարդկային ռեսուրսները՝ 9-ից մինչև 12 մլն ըստ տարբեր գնահատականների (տե՛ս, օրինակ, [10, 11]),
  - \* համեմատաբար մեծ չեն, հաշվառված և համակարգված չեն մտավոր-

<sup>1</sup> Հատկանշական է, որ առկա գնահատականները, որպես կանոն, չեն ընդգրկում այլալեզու-այլադավան հայերին վերաբերող տվյալները: Այսինքն՝ բացակայում են Հայության թվաքանակի ճշգրիտ հաշվառման մեթոդները:

ստեղծագործական<sup>1</sup> ու զուտ ստեղծատվական ռեսուրսները (մոտ 2–5 հազար «հայկական» կայք ինտերնետում<sup>2</sup>, ուր շարունակաբար նորացվող կայքերի թիվը հասնում է 110 մլն-ի):

- Կարծես թե բավարարին մոտ են և նույնպես հաշվառված չեն *նյութական ռեսուրսները* (հայկական կապիտալն աշխարհում, դատելով ՋԼՄ հրապարակումներից, կազմում է նվազագույնը մի քանի տրիլիոն դոլար):
- Ինչպես ցույց են տալիս դիտարկումները, միանշանակ բավարար չեն *կազմակերպչական ռեսուրսները*. Հայությունը, ըստ մեզ, որոշակի խնդիրներ ունի մենեջմենթի ոլորտում (բավական է նշել, որ առայսօր բացակայում է Հայության կազմակերպման հայեցակարգը):

Ինչպես տեսնում ենք, կենսունակության և մրցակցության համար անհրաժեշտ ռեսուրսների առումով Հայությունը յուրօրինակ կարգավիճակ ունի: Տպավորությունն այն է, որ միանշանակորեն տիրապետելով քաղաքակրթական, կարծես թե բավարար չափով՝ տեխնոլոգիական ու նյութական ռեսուրսների, Հայության կարգավիճակը գլոբալ աշխարհում կարող էր ավելի բարձր լինել, իսկ իրավիճակը՝ ավելի բարվոք: *Նման իրադրության պատասխանը, ըստ մեր համոզման, ընկած է կազմակերպչական ռեսուրսների հարթությունում*: Ակնհայտ է, որ ներկայացված տարբեր տիպերի ռեսուրսները միմյանց հետ փոխադրված են, և *թերացումները կազմակերպչական ոլորտում սահմանափակում (լիմիտավորում) և նվազեցնում են մնացած բնագավառներում ընթացող գործառնությունների արդյունավետությունը*:

Թերևս, չարժե մանրամասն ներկայացնել կազմակերպչական գործոնի կարևորությունը. ակնհայտ իրողություն է, որ բարձր կազմակերպվածությունն այլ ռեսուրսների սակավաթիվ լինելու պարագայում բերում է հաջողությունների, իսկ կազմակերպվածության բացակայությունը՝ անհաջողությունների այլ բնույթի հսկայական ռեսուրսներ տիրապետողներին: Անշուշտ, Հայությունը զուրկ չէ կազմակերպչական ունակություններից, այլապես մենք հազարամյակների պատմություն չէինք ունենա: Հիշատակենք թեկուզ հաղ-

<sup>1</sup> Նշենք, որ գիտության խորհրդային համակարգի փլուզումը Հայության համար լրջագույն կորուստ էր: Հայտնի է, որ այսօր ՀՀ Գիտությունների ազգային ակադեմիան ճգնաժամային վիճակում է (բավական է հիշել, որ գիտությանը ՀՀ-ում հատկացվում է ՀՆԱ ընդամենը 0,2%-ը, մինչդեռ եվրոպական և հետխորհրդային որոշ երկրներում՝ մինչև 1,5%): Այս ոլորտում գործող Հայության ներկայացուցիչներն արտերկրում առայժմ ազգային գիտական համակարգ չեն ձևավորել: Տե՛ս նաև *Գագիկ Հարությունյան*, Հայաստանը գլոբալ աշխարհում, 21-րդ դար, #2 (17), էջ 3, 2007:

<sup>2</sup> Ըստ «Նորավանք» հիմնադրամի Հայագիտական կենտրոնի փորձագիտական գնահատականների: Հայության ստեղծատվական ռեսուրսների մասին տե՛ս նաև *Գարեն Վրթանեսյան*, *Սամվել Մարտիրոսյան*, Համացանցը և մենք. վերլուծական ակնարկ, «Ռազմավարության և անվտանգության հարցեր» ժողովածու, էջ 205, «Արարատ» ռազմավարագիտական կենտրոն, Ե., 2007:



թանակը Ղարաբաղյան հակամարտությունում. համաձայն փորձագիտական գնահատականների, դա տեղի ունեցավ առաջին հերթին կազմակերպչական-տեխնոլոգիական բնույթի առավելությունների շնորհիվ:

Սակայն տպավորությունն այն է, որ ոչ էքստրեմալ պայմաններում Հայությունը երբեմն ցուցաբերում է որոշակի անհոգություն, ինչը բացասաբար է անդրադառնում, մասնավորապես, Հայության տեղեկատվական ոլորտի կազմակերպման գործընթացների վրա: Այս իրողությունը, թերևս, առաջին հերթին պահանջում է հստակեցնել և հնարավորինս համակարգել Հայության *SU* կազմակերպման խնդիրները, որից հետո միայն փորձել գտնել այդ խնդիրները լուծելու կազմակերպչական եղանակները և ձևերը:

**Հայության տեղեկատվական ոլորտի կազմակերպման խնդիրները.** Համաձայն մեր պատկերացումների, ոլորտի բազմաթիվ խնդիրներից առաջնահերթ պետք է առանձնացնել հետևյալները.

1. Հայության տեղեկատվական ռեսուրսների գնահատումը և նորերի ձևավորումը, դրանց արդյունավետ ու անվտանգ գործունեության համակարգի մշակումը:
2. Հայությանը Հայաստանի և Հայության վերաբերյալ տեղեկատվական իրազեկման ապահովումը, տեղեկատվական քաղաքականություն վարելու համար անհրաժեշտ շտեմարանների ձևավորումը:
3. Հայության ազգային շահերից բխող.
  - ներհայկական և արտաքին քարոզչության/հակաքարոզչության հայեցակարգային ու տեխնոլոգիական մշակումը և գործնական իրականացումը,
  - Հայության և Հայաստանի վերաբերյալ փոխլրացնող *իմիջների (պատկերացումների)* մշակումը, դրանց ներդրումը՝ որպես գիտակցության բաղադրամաս, Հայության ու այլ հանրությունների գիտակցություններում,
  - քաղաքական, գիտական, ուսումնական և այլ բնույթի համահայկական ծրագրերի իրականացումը:
4. Ժամանակակից տեղեկատվական քաղաքականության կիրառումը Հայության քաղաքական, պահանջատիրական, մշակութային, տնտեսական և այլ ոլորտների խնդիրների լուծման գործում:
5. Համահայկական տեղեկատվական ցանցակենտրոն կազմակերպչական համակարգի հայեցակարգային մշակումը և դրա միջոցով Հայության միասնական տեղեկատվական դաշտի ձևավորումը:

*Առաջին երեք կետերն* արդյունավետ իրագործելու համար անհրաժեշտ է կազմակերպել միջազգային հայկական տեղեկատվական կառույցներ, որոնք, մասնավորապես, պետք է ստեղծեն Հայաստանի և Հայության մասին իրազեկող բազմակեզու կայքեր և այլ բնույթի լրատվական ձևաչափեր, ուսումնասիրեն սփյուռք ունեցող ազգերի տեղեկատվական-կազմակերպչական փորձը, ձևավորեն տեղեկատվական շտեմարաններ և կազմակերպեն տարաբնույթ միջոցառումներ:

*Անդրադառնալով 4-րդ կետին՝ արդի տեղեկատվական քաղաքականությունը*, նշենք, որ գլոբալացվող աշխարհում տեղեկատվական տեխնոլոգիաների զարգացման և տարածման հետևանքով քաղաքականությունում կարևոր դերակատարում են սկսել ձեռք բերել ոչ միայն պետական կառույցները, այլև առանձին կազմակերպությունները և անգամ անհատները: Այսինքն՝ Հայության ոչ պետական կառույցները՝ համայնքները, հասարակական և քաղաքական կառույցները, ի վիճակի են վարելու որոշակի քաղաքականություն: Նման բնույթի տեղեկատվական քաղաքականությունն իրականացվում է, մասնավորապես, հետևյալ մեթոդներով [12].

- *Կիրառական քաղաքականություն*. Համաձայն եզրի հեղինակ Դևիդ Ռոտկոպֆի (1998թ.), տեղեկատվական տեխնոլոգիաների զարգացումը հանգեցրել է նրան, որ քաղաքականության ավանդական սուբյեկտները՝ պետությունները, արդեն կորցրել են գիտելիքներին (տեղեկատվությանը) տիրապետելու իրենց մենաստիրությունը: Նախկինում միայն հատուկ կառույցները և դիվանագետները գիտեին, թե ինչ է կատարվում աշխարհի այս կամ այն մասում, մինչդեռ այսօր ինտերնետից շարքային օգտվողը նույնպես իրազեկ կարող է լինել այդ տեղեկատվությանը և, հետևաբար, կարող է ունենալ որոշակի դերակատարում տեղեկատվական-քաղաքական գործընթացներում:
- *Նոր քաղաքականություն (գիտելիքների քաղաքականություն)*. Ջոն Արքիլը և Դևիդ Ռոնֆելդը, 1999թ. հրատարակած իրենց աշխատությունում նույնպես փաստելով պետության դերի նվազման հանգամանքը, գտնում են, որ քաղաքականության նոր սուբյեկտները՝ միջազգային կազմակերպությունները, ՁԼՄ-ն, անդրազգային (տրանսնացիոնալ) տնտեսական ընկերությունները, ահաբեկչական և հանցավոր կառույցները ձեռք են բերել գիտելիքային/տեղեկատվական ռեսուրսներ, ինչը թույլ է տալիս նրանց վարել ինքնուրույն քաղաքականություն գլոբալ տեղեկատվական դաշտում:

- *Մեդիա-քաղաքականություն*. Այս եզրը 2001թ. շրջանառության մեջ է դրել Լի Էդվարդը, որն ապացուցել է, որ ինտերնետը և հեռուստատեսությունը վերածվել են քաղաքականության կարևորագույն գործոնի: Դրանք են, որ էական դեր են կատարում արտաքին և ներքին քաղաքականության ձևավորման գործում, այս կամ այն հիմնախնդրի վրա են հրավիրում հանրության և իշխանության ուշադրությունը:

Թվարկված տեղեկատվական քաղաքականության տեսակներին, ըստ մեզ, անհրաժեշտ է ավելացնել ևս մի նոր եզր և հասկացություն, այն է՝ ***մոբայլ քաղաքականությունը***: Վերջինս արտահայտում է *մոբիլ, բջջային հեռախոսները*, այսպես կոչված՝ երրորդ էկրանի (հեռուստացույցի և համակարգչի մոնիտորի հետ միասին) լայն տարածման և նրանց տեխնիկական հնարավորությունների զարգացման իրողությունը: Նման հեռախոսներից օգտվողները (որոնց թիվն այսօր միլիարդից ավելի է) հնարավորություն ունեն ստանալ, մշակել և հաղորդել տեքստային, աուդիո- և վիդեոտեղեկատվություն դինամիկ, մոբայլ ռեժիմում՝ անկախ տեղակայման վայրից կամ աշխարհագրական կոորդինատներից): ***Մոբայլ քաղաքականությունն*** այսօր կարևոր գործոնի է վերածվել և՛ արտաքին (հիշենք 2006թ. արաբա-իսրայելական հակամարտությունը [13]), և՛ ներքին ոլորտներում (նշենք 2008թ. ՀՀ նախագահական ընտրությունների հետ կապված զարգացումները, երբ ցուցարարների գործողությունները համակարգվում էին հիմնականում SMS հաղորդագրությունների միջոցով): Մոբայլ տեխնոլոգիաներն այսօր կարևոր դերակատարում ունեն նաև սոցիալական-տնտեսական ցանցերի ձևավորման գործընթացում:

Հայության տեղեկատվական ոլորտի կազմակերպման խնդիրների հինգերորդ կետը՝ *տեղեկատվական ցանցակենտրոն (ՏՑ) կազմակերպչական համակարգի հայեցակարգային մշակումը և դրա միջոցով Հայության միասնական տեղեկատվական դաշտի ձևավորումը, պետք է ընդունել որպես ռազմավարական գերնպատակ*: Նման գնահատականը պայմանավորված է հետևյալ նկատառումներով:

Արդի աշխարհում ՏՑ կազմակերպչական ձևը համարվում է ամենակատարյալը: *Ցանցակենտրոն* համակարգի տարրերը, լինելով ապակենտրոնացված, սակայն ունենալով ինքնուրույնության բարձր աստիճան և արդյունավետ գործելու լայն հնարավորություններ, գտնվում են *միասնական տեղեկատվական դաշտում՝ ցանցում*, ունեն միասնական ղեկավարություն և նպատակներ: Մասնավորապես ցանցակենտրոն ձևաչափը մեծ կայունություն ունի. երբ համակարգի բաղադրիչներից մեկը շարքից դուրս է գալիս, ապա մնացածները՝ ինքնավարության բարձր աստիճանի շնորհիվ, կարողանում են շարունակել իրենց նպատակային գործունեությունը: Նկատենք, որ ՏՑ համա-

կարգի զանազան մոդիֆիկացիաներ ընդունված են ԱՄՆ-ի և այլ տերությունների կողմից, որպես, մասնավորապես, իրենց զինված ուժերի կազմակերպման հիմնադրույթ [14]: Հատկանշական է, որ համաձայն որոշ հետազոտողների, նման ցանցային գործընթացի արդյունքում կարող է ձևավորվել կոլեկտիվ-թիմային գերինտելեկտ, որը հնարավորություն է տալիս լուծել առանձին անհատներին անհասու գերդժվար խնդիրներ [15]: Բնորոշ է նաև, որ որոշ հետազոտողների կարծիքով՝ ապագա գլոբալ հասարակարգը ներկայացնելու է ցանցային կառույցների մի համախումբ [16]:

Տեղեկատվական արդի դարաշրջանը հնարավորություն է տալիս ոչ միայն պետություններին, այլև տարաբնույթ կազմակերպություններին ձևավորել ցանցային համակարգեր, և այդ առումով ՏՅ ռազմավարության կիրառումը Հայության կողմից պետք է որ խիստ արդյունավետ լինի. այն, մասնավորապես, թույլ կտա իրագործել համազգային քաղաքական, գիտատեխնիկական, մշակութային և տնտեսական նախագծեր:

Նշենք, որ Հայությունը դեռ պատմական անցյալում տիրապետում էր ցանցային կազմակերպման մեթոդներին, իսկ այսօր ցանցակենտրոն սկզբունքի հիման վրա գործում են Հայ Առաքելական եկեղեցին, Հայ Հեղափոխական Դաշնակցությունը, Հայ Բարեգործական Ընդհանուր Միությունը, Գյուլբենկյան հաստատությունը և այլ ազգային կազմակերպություններ: Այդ կառույցները, անշուշտ, հսկայական ներդրում ունեն Հայության պահպանման գործում: Հարկ է նկատել սակայն, որ վերոնշյալ կառույցների միջև երբեմն բացակայում է տեղեկատվական հակադարձ դրական կապը: Միննույն ժամանակ, որպես Հայության կառույցների բացթողում կարելի է համարել այն հանգամանքը, որ նրանք միշտ չէ, որ կիրառում են արդիական կազմակերպչական մեթոդները, իսկ ազգային շահերի վերաբերյալ նրանց պատկերացումները երբեմն չեն բավարարում փորձագիտական մոտեցումներին:

Վերոնշյալ անբարենպաստ գործոնները, անշուշտ, համակարգային բնույթ են կրում և լրացուցիչ վկայում են այն մասին, որ ցայսօր հստակորեն ձևակերպված չեն Հայության կազմակերպչական հիմնադրույթները և ազգային շահերը: Այսինքն՝ հայկական ՏՅ համակարգի համար անհրաժեշտ է մշակել հայեցակարգային-գաղափարախոսական մոտեցումներ: Դա թույլ կտա պահպանել համակարգի կենսունակությունը և կայունությունն անգամ կառավարման կենտրոնի վերացման դեպքում, քանի որ համակարգի մնացյալ տարրերը կշարունակեն իրենց գործունեությունը՝ ելնելով այդ հայեցակարգային-գաղափարախոսական դրույթներից, որոնք դրված են կառավարման հենքում:

Հաշվի առնելով նշված իրողությունները՝ փորձենք քննարկել Հայության ՏՅ համակարգի ընդամենը մի քանի հնարավոր տարբերակները, որոնք կապված են Հայաստանին տեսականորեն սպասվող որոշ սցենարների հետ: Մասնավորապես, սխեմատիկորեն դիտարկենք, ի թիվս այլ բազմաթիվ տեսական

տարբերակների, հետևյալ երկու ծայրահեղ և մեկ միջանկյալ սցենարները:

**«Վիրտուալ Հայաստան».** Այս ծայրահեղ բնույթի սցենարի էությունը հետևյալն է. որոշակի ռազմաքաղաքական զարգացումների արդյունքում ներկայիս Հայաստանը (ՀՀ և ԼՂՀ) հայաթափվում է և վերածվում վերացական, վիրտուալ գաղափար-հասկացության (մոտավորապես այն կարգի, ինչպիսին է Հայության համար ներկայիս Արևմտյան Հայաստանը): Դա հնարավոր է, մասնավորապես, հետևյալ զարգացումների պարագայում.

1. **Միջուկային-էկոլոգիական աղետ.** Իրան-ԱՄՆ, Իսրայել հակամարտությունը հանգեցնում է տարածաշրջանային միջուկային պատերազմի, որի հետևանքով Իրանի հարևան Հայաստանը ենթարկվում է էկոլոգիական աղետի: Միջուկային պատերազմների հետևանքների գիտական կանխատեսումները 60-ամյա պատմություն ունեն, սակայն ներկայացնենք դրանցից ամենավերջինը: Համաձայն Կոլորադոյի համալսարանում (ԱՄՆ) կատարված հետազոտության, լոկալ հակամարտությունում 50 ատոմային ռումբ (որոնց հզորությունը չի գերազանցում Հիրոսիմայի վրա նետվածին) օգտագործելու դեպքում, մասնավորապես, կգոյանա օզոնային խոռոչ, որի հետևանքով կգոհվի 50 մլն մարդ, այսինքն՝ մոտավորապես այնքան, որքան Երկրորդ համաշխարհային պատերազմի ժամանակ<sup>1</sup>: Կարելի է ենթադրել, որ նման աղետի հետևանքով բնակույթը ներկայիս Հայաստանի տարածքում դառնում է աննպատակահարմար:
2. **Ռազմական-քաղաքական աղետ.** Որոշակի աշխարհաքաղաքական ցնցումների և ռազմաքաղաքական զարգացումների արդյունքում ՀՀ-ն և ԼՂՀ-ն ենթարկվում են Թուրքիայի և Ադրբեջանի լայնամասշտաբ ինտերվենցիային ու երկարաժամկետ օկուպացիային:
3. **Հետևանքները.** Սցենարներից որևէ մեկի իրագործման արդյունքում դադարում են գործել հայկական պետությունները, իսկ Հայաստանի ներկայիս տարածքը հայաթափվում է: Նման պարագայում, թերևս, տեղի կունենա Հայության վերաբաշխում այլ երկրներում, իսկ Հայաստանն ինչ-որ ժամանակահատվածում ձեռք կբերի անմարդաբանակ, *վիրտուալ* Հայրենիքի գաղափար:

Նկատենք, որ ներկայացված, գուցե անհավանական թվացող, սակայն տեսականորեն հնարավոր սցենարները Հայաստանի անվտանգության դեմ ուղղված հիմնական սպառնալիքներից ընդամենը մի քանիսն են: Նման զարգացման պարագայում Հայության գոյատևման և կազմակերպման խնդիրները հնարավոր է իրագործել բացառապես **ՏՅ** համակարգի ձևավորման միջոցով:

<sup>1</sup>«Ученые описали катастрофические последствия локальной ядерной войны». [http://lenta.ru/news/2008.04.08/nuclear/\\_Printed.htm](http://lenta.ru/news/2008.04.08/nuclear/_Printed.htm): Այս առիթով նկատենք նաև, որ մասնակի միջուկային-էկոլոգիական աղետի կարող է հանգեցնել նաև տեխնոլոգիական վթարը Մեծամորի ԱԷԿ-ում:

Ստեղծված պայմաններում համակարգի կենսունակությունը գործնականում կարող է երաշխավորված լինել, թերևս, այն դեպքում, երբ զուգահեռ գործեն մի քանի տեղեկատվական կառավարման կենտրոններ, որոնցից որևէ մեկը չունի գերակայող կարգավիճակ: Այդ կենտրոնները պետք է ղեկավարվեն Հայության անվտանգության հայեցակարգը ներկայացնող միասնական ազգային գաղափարախոսական հիմնադրույթներով: Գործունեության արդյունավետությունն ապահովելու համար համակարգի այդ կենտրոնները, իսկ ցանկալի է՝ ընդհանրապես բոլոր բաղադրիչները, պետք է ձգտեն մշտապես փոխհամագործակցել միմյանց հետ, այդպիսով ձգտել ապահովել *դրական հետադարձ* (այլ խոսքերով՝ միմյանց ուժեղացնող) *կապը* համակարգի տարրերի միջև: Նման փոխհամագործակցություն և փոխազդեցություն ապահովող համակարգերն ընդունված է անվանել *նչգծային*:

**«Հզոր Հայաստան».** Այս սցենարը ենթադրում է հետևյալ զարգացումները. աշխարհաքաղաքական ցնցումների և զարգացումների հետևանքով Հայաստանը վերականգնում է իր տարածքային ամբողջականությունը, իսկ Հայությունը կենտրոնանում է այդ նոր ու հզոր պետությունում: Դա հնարավոր է, մասնավորապես, հետևյալ իրադրություններում.

1. Թուրքիան ներգրավվում է լայնամասշտաբ պատերազմի մեջ իր հարևաններից որևէ մեկի կամ մի քանիսի հետ միաժամանակ (օրինակ՝ Իրաքի, Հայաստանի և Հունաստանի հետ):
2. Թուրքիայի համար պատերազմի անհաջող ընթացքը հանգեցնում է միջերկրկան կոնֆլիկտի սաստկացման. քրդերի կողմից արդեն իսկ վարվող պայքարին միանում են նաև այլ ազգային փոքրամասնություններ՝ հայերը, հույները և այլք, այսինքն՝ այսպես կոչված «ինքնության ճգնաժամը» տեղափոխվում է գործնական ռազմական-քաղաքական հարթություն:
3. Վերոնշյալ գործընթացները սրում են հարաբերությունները ներթուրքական տարբեր քաղաքական կողմնորոշումներ ունեցող խմբավորումների միջև և, ի վերջո, բերում քաղաքացիական բախումների: Պետության և հանրության ճգնաժամն ընդունում է քառսային և անվերահսկելի բնույթ:
4. Հայաստանը և Հայությունն (գուցեև այլ շահագրգիռ տերությունները) օգտվում են Թուրքիայում ստեղծված իրադրությունից, նպաստում այդ երկրի մասնատմանը և կարողանում զգալիորեն վերականգնել Հայաստանի տարածքային ամբողջականությունը: Որպես հաջորդ քայլ իրականացվում է Հայության կենտրոնացումը պատմական տարածքների մի մասում. այդպիսով ձևավորվում է Հայկական հզոր պետություն:

Սակայն անգամ **Հզոր Հայաստանը**, որտեղ կարող է բնակվել Հայության գերակշռող մասը, պետք է ձգտի ունենալ զարգացած երկրներում իր սակա-

վաթիվ, բայց կարող համայնքները: Այսինքն, եթե անգամ Հայաստանը վերածվում է **Հայության գերակայող կենտրոնի**, միևնույն է, պետք է ձգտել պահպանել սփռված Հայության ավանդական դարձած ռեսուրսները՝ դրանց հաղորդելով յուրահատուկ դեսպանությունների կարգավիճակ: Այս տարբերակում պետք է ձևավորել Հայության կազմակերպման Հայաստանակենտրոն դասական **ՏՅ** համակարգ, երբ կառավարումը գլխավորապես իրագործվում է մեկ կենտրոնից:

**«Զարգացած Հայաստան».** Այս սցենարը ենթադրում է հայեցակարգային, բայց գծային զարգացման արդյունքում ձևավորված Հայաստան մարտավարական ապագայում: Նման պարագայում ենթադրվում են հետևյալ իրողությունները.

1. Հայաստանը Հայության, պետական ռեսուրսների և դաշնակից-գործընկեր երկրների աջակցությամբ ձեռք է բերել ռազմական անվտանգության երաշխիքներ, հնարավորինս ինտեգրվել է համաշխարհային տնտեսությանը, սկսել ազատագրված տարածքների վերաբնակեցման գործընթացը:
2. **Զարգացած Հայաստանը** դառնում է խիստ գրավիչ Հայության համար, Հայաստան-Հայություն հարաբերություններն ընդունում են համակարգված բնույթ, սկսում է ձևավորվել Հայության միասնական տեղեկատվական դաշտը:

Ներկայացված այս զարգացումներն ամենաիրատեսականն են և թերևս՝ անգամ պարտադրված, քանի որ *նչ զարգացած Հայաստանի պարագայում Հայության կազմակերպման ՏՅ համակարգի ձևավորումը կապված է անհամեմատ մեծ բարդությունների հետ:*

Կասկած չի հարուցում, որ **Զարգացած Հայաստանը**, տիրապետելով ազգային *կազմակերպչական* ռեսուրսների մի գերակշռող մասին, կներկայացնի Հայության ամենակազմակերպված հատվածը: Արդյունքում՝ նման պետությունը **ՏՅ** համակարգում ձեռք կբերի կարևորագույն դերակատարում: Միևնույն ժամանակ, ազգային *տեխնոլոգիական և նյութական* ռեսուրսների մի զգալի մասը գտնվում է այլ քաղաքակրթական գոտիներում և երկրներում բնակվող Հայության, ինչպես նաև այլ կազմակերպչական ձևաչափերում գործող հայերի ձեռքում. այսինքն՝ Հայության այդ հատվածները նույնպես կարող են առաջատար դեր կատարել Հայության **ՏՅ** համակարգում:

Այսպիսով, **Զարգացած Հայաստանի** առկայության դեպքում տեղեկատվական կազմակերպման տեսանկյունից Հայությունը հայտնվում է նախորդ երկու սցենարների համեմատ միջանկյալ վիճակում: Նման միջանկյալ համակարգն իր մեջ պետք է համատեղի և՛ *նչգծային (սփռված)*, և՛ *դասական (Հայաստանակենտրոն)*, **ՏՅ** հայեցակարգերը:

**Որոշ հետևություններ.** Արդի ժամանակաշրջանում տեղեկատվության տիրապետման և դրա արդյունավետ, նպատակաուղղված օգտագործման ունակությունը դարձել է ազգերի կենսունակության և մրցունակության կարևորագույն չափանիշ: Հայության պարագայում տեղեկատվական գործոնի նշանակության բարձրացումը միաժամանակ վտանգավոր մարտահրավերների և նոր հնարավորությունների աղբյուր է հանդիսանում: Ակնհայտ է, որ մարտահրավերներին դիմակայելու և հնարավորություններն օգտագործելու համար անհրաժեշտ են տարաբնույթ ազգային ռեսուրսներ և, առաջին հերթին, հայեցակարգային պատկերացումներ ազգային/տեղեկատվական անվտանգության հիմնախնդիրների վերաբերյալ: Մինևույն ժամանակ, տիրապետելով քաղաքակրթական, տեխնոլոգիական և նյութական ռեսուրսների Հայությունը որոշակի խնդիրներ ունի կազմակերպչական ոլորտում: Այդ համատեքստում առանձնահատուկ ուշադրության են արժանի ազգային ցանցակենտրոն տեղեկատվական-կազմակերպչական համակարգի տեսական մշակումն ու գործնական կիրառումը: Նման համակարգը կարծես թե առավելագույնս է համապատասխանում ապակենտրոնացված-սփռված Հայության շահերին և, մասնավորապես, թույլ է տալիս կիրառել հեռանկարային ռազմավարություն ժամանակակից տեղեկատվական քաղաքականության տեխնոլոգիաների միջոցով:

*Ապրիլ, 2008թ.*

### Աղբյուրներ և գրականություն

1. Հայաստանի Հանրապետության Ազգային անվտանգության ռազմավարություն, «Ամարաս», Երևան, 2007:
2. *Հարությունյան Գ.*, ՀՀ տեղեկատվական համակարգի զարգացման հիմնախնդիրները ազգային անվտանգության համատեքստում, «Նորավանք» ԳԿՀ, Երևան, 2003:
3. *Հարությունյան Գ.*, Տեղեկատվական անվտանգության որոշ խնդիրների շուրջ, Տարածաշրջան, «Նորավանք» գիտակրթական հիմնադրամի տեղեկագիր, էջ 3, 2005:
4. *Տեր-Հարությունյան Գ.*, ՀՀ տեղեկատվական անվտանգության խնդիրների շուրջ, Հանրապետական, #3(65), էջ 1, 2008:
5. *Хантингтон С.*, Столкновение цивилизаций, Москва, 2003.
6. *Арутюнян Г.*, Цивилизационный фактор в контексте проблем информационной безопасности, 21 Век, #1 (3), с. 3, 2006.
7. *Сергеев В.М., Казанцев А.А.*, «Сетевая динамика глобализации и типология «глобальных ворот», Полис, #2, с. 18, 2007; *Арутюнян Г.*, Армения в глобальном мире, 21 Век, #2(6), с. 3, 2007.



8. *Տեր-Հարությունյան Գ.*, Հոգևոր անվտանգությունը որպես տեղեկատվական անվտանգության բաղադրամաս. Տարածաշրջան, «Նորավանք» գիտակրթական հիմնադրամի տեղեկագիր, էջ 29, 2005:
9. *Саргсян Т.*, Армянская цивилизация как амбициозный проект, 21 Век, #1 (5), с. 3, 2007.
10. *Հայ Միջուկը*, Հանրագիտարան, Երևան, 2003:
11. *Մալխաչյան Մ.*, Հայերն աշխարհում, 2007:
12. *Гриняев С.*, Поле битвы – киберпространство. Минск, 2004; Washington Profile, #47 (564), 05.05.2005.
13. *Арутюнян Г.*, «Промежуточная» война, 21 Век, #2(4), с. 3, 2006.
14. *Paul T. Mitchell*, Network Centric Warfare, IISS, Adelphi Paper 2006.
15. *Гриняев С.*, Интернет как супермозг: от гипотезы до модели, 21 Век, #1, с. 142, 2003.
16. *Մարգարյան Տ.*, Պետության վախճանը, 21 դար, #1 (19), էջ 3, 2008:

## ПРОБЛЕМЫ ОРГАНИЗАЦИИ И ИНФОРМАЦИОННОЙ БЕЗОПАСНОСТИ АРМЯНСТВА

*Գագիկ Արուտյոնյան*

Резюме

В настоящее время владение информационными ресурсами, а также умение эффективно и целенаправленно их использовать стало одним из важнейших критериев жизнеспособности и конкурентоспособности наций. В случае с Армянством повышение роли информационного фактора является одновременно источником как опасных вызовов, так и новых возможностей. Однако для адекватного ответа вызовам необходимы соответствующие ресурсы и, в первую очередь, концептуальные представления относительно проблем национальной/информационной безопасности. Армянство, владея необходимыми цивилизационными, технологическими и материальными ресурсами, вместе с тем имеет определенные проблемы в организационном плане. В этом контексте особое внимание следует обращать на теоретическую разработку концептов сетевцентрической информационно-организационной системы и апробацию этой системы на практике. Подобная система, на наш взгляд, наиболее соответствует национальным интересам децентрализованного, рассеянного Армянства: она позволит применить перспективную стратегию с использованием современных методик информационной политики.